



Fakulti Pengurusan dan Perniagaan, UiTM Negeri Sembilan sentiasa proaktif dan produktif dalam mewujudkan ekosistem keusahawanan melalui kursus ENT300 di kalangan mahasiswa bagi melestarikan pembudayaan keusahawanan yang lebih kondusif dan menyeluruh. Sehubungan itu, program Trek Usahawan Berjaya: Kreatif atau Inovatif secara webinar telah dianjurkan dengan jayanya yang melibatkan lebih 500 mahasiswa UiTM kampus Rembau pada 12 November 2020. Program ini merupakan sesi perkongsian dan soal jawab bersama usahawan jemputan yang telah berjaya dalam bidang keusahawanan yang diceburi masing-masing.

Tiga (3) usahawan jemputan yang terlibat adalah tuan Hussein Mohd Said (usahawan Mega Water Sports & Holidays Sdn Bhd), tuan Muhammad Firdaus Osman (usahawan Saudagar Mover Enterprise) dan puan Aineedhia Roslan (usahawan kecantikan) yang mempunyai pengalaman yang luas dalam industri pelancongan, logistik, akuakultur dan juga kecantikan. Apa yang lebih menarik, usahawan jemputan juga mengupas lebih lanjut mengenai pengurusan perniagaan semasa pandemik COVID 19 yang melanda dunia dan implikasinya ke atas perniagaan yang diusahakan oleh mereka. Sesi perkongsian ini membuka mata mahasiswa bahawa setiap usahawan itu perlu berani mengambil risiko dan sentiasa kreatif serta inovatif dalam mempelbagaikan cara jualan terutamanya di kala norma baharu.


Selain itu, program ini bertujuan untuk menerapkan minda keusahawanan di kalangan graduan supaya mereka dapat melihat bidang keusahawanan mampu memberi impak positif sekiranya diceburi dengan kesungguhan yang

jitu. Bersesuaian dengan tema program, mahasiswa perlu mempunyai minda yang sentiasa ke hadapan serta berani mengambil risiko di samping merealisasikan ide kreatif serta inovatif dalam bidang keusahawanan.

Program ini juga bertujuan sebagai langkah persediaan mahasiswa dalam mengharungi kebolehpasaran graduan dan meningkatkan jumlah graduan yang bakal menjadi majikan dan memiliki perniagaan sendiri seiring dengan hasrat Kementerian Pengajian Tinggi (KPT) untuk melahirkan lebih ramai usahawan dalam kalangan graduan. Semoga dengan usaha murni pihak fakulti dan para pensyarah ENT300 dapat melahirkan ramai graduan UiTM kampus Rembau yang akan menjadi majikan dan mempunyai empayar perniagaan yang tersohor di mata dunia.



Sesi perkongsian usahawan jemputan membincangkan impak pandemik COVID 19 kepada sektor pelancongan sukan air di dalam negara.



Sektor kecantikan di antara bidang keusahawanan yang mampu memberi pulangan yang lumayan semasa norma baharu.



Usahawan yang berjaya adalah usahawan yang sentiasa maju ke hadapan dan mempelbagaikan bidang perniagaan.